

HEZKUNTZA. 'Integrazioaren sei orenak' izanen dira kanpainako ekitaldi nagusia, eta martxoaren 8an egingen da

Ahalmen urriko haurren integrazioaren erronkari ihardetsi nahi dio Seaskak

Integrazio Batzordeak 30.000 euro erdiesteko xedea dauka aurten

Aitor Renteria | BAIONA

Laugarren urtez jarraian, Seaskako Integrazio Batzordeak ahalmen urriko haurren integrazioaren erronkari ihardetsi nahi dio. Orain artean, kanpainaren ardatz nagusia sostengu

kantaldiak ziren, baina iaz xede berria bultzatu nahi izan zuen Seaskak: Partaidetza kanpaina. Aurtengo kanpainak martxoaren 8an izanen du ekitaldi nagusia: *Integrazioaren sei orenak*. Euskal Irratietan egingen dute ekitaldi hori.

Dagoeneko hainbat elkartek sostengua helarazi dio Seaskaren Integrazio Batzordeari. Laguntzak hiru eratakoak izan daitezke. Lehenik eta behin, Integrazio Batzordeak 2.500 gutun igorri ditu, partaidetza eskatzeko. Jendeak diru laguntza zuze-

nean eman dezake. Horrez gain, hainbat elkarte eta enpresak bat egin dute ekimenarekin, diru laguntzak eskainiz. Azkenik, bertze elkarte batzuek ekimen bereziak antolatuko dituzte, eta bildutako dirua Integrazio Batzordeari eman.

Aurrekontua

Izan ere, ahalmen urriko haurren integrazioa ikasturteko une garrantzitsua da Seaskaren dinamikan. Integrazioari ekin zionetik, zailtasunak dituzten haurren kopuruak gora egin du nabarmen. Dagoeneko hamar dira Seaskaren ikastoletan integratuta dauden ahalmen urriko haurrak.

Alabaina, kopuruarekin batera xahutzeek ere gora egiten dute. Iazko aurrekontua 18.000 mila eurokoa zen, eta aurtengo, 30.000 eurokoa. Izan ere, haur horiek laguntzaileak eta, zenbaitetan, hezitzaileen laguntza berezia behar dute. Baina Seaskan dauden hamar haurretik bik baizik ez dute Frantziako Hezkuntzaren laguntza.

Egoera hori ikusirik, Seaskak integrazioaren bidea bere alde-rik jorratzeko erabakia hartu du. Haurrak euskaraz eskolatzeko aukera bakarra eskaintzen du Seaskak. «Hezkuntza Bereziko arloko batzorde eta profesional gehienek ahotan entzun izan dugu ezinezkoa dela zailtasunak dituzten haurrak bigarren hizkuntza batean hezteko», erran zuen Ladis Arrosagarai Integrazio Batzordeko kideak. «Hego Euskal Herrian posible dena zergatik ez hemen?», galdetu zuen. «Lau urtez frogatu dugu baliabide gehiago emanez gero ahalmen urriko haurrek besteekin bizi eta ikas dezaketela».

LAGUNTZAK

Erabaki politikoak gauzatzeko behar gorria

Frantziako Gobernuak gazte enpleguak bukatzea deliberratu du, eta ordezkoko sistema bat ezarri nahi du indarrean. Alta, eskoletako laguntzaile postu asko eta asko mota horretakoak dira. «Nahiz eta beharrak agerian utzi, egoera guztiz trabaturik dago orain berean, ez aitzin, ez gibel», adierazi zuen Patrice Lagisquet Chrysalide elkar-tereko partaideak. Jacques Chirac Frantziako lehendakariak 6.000 postu sortu behar zirela iragarri bazuen ere, lanpostu horiek ez zaizkio gehituko gaur egungoei. «Sistema prekario batetik beste prekario batera abiatzen gara», azaldu zuen Lagisquetek. Kasu anitzetan ez dira aski eskola laguntzaileak, hezitzaile bereziak behar dira, eta horiek ez dira Frantziako Hezkuntzaren esku-mena.

Elkarrekin egindako ikasbide hori, haurrentzat ez ezik, guraso, irakasle, eskola eta gizartearentzat aberasgarriak direla dio Integrazio Batzordeak. «Partaidetza kanpainaren bidez, behar dugun dirua lortzea baino garrantzitsuago den zerbait erdiesten dugu, emeki-emeki gizartearen begirada aldatzea». Horren adierazgarri Integrazio Batzordeak aurtengo kanpainarako hautatu duen leloa: *Ez uka, ez duda*.



GAIZKA IROZ

Seaskako Integrazio Batzordeak atzo eskainitako prentsurrekoa.

ETXEBIZITZAK. Ez zaie gutxieneko errentarik izatea eskatuko, eta senideei eskaturiko diru sarrerak 3.000 eurora murriztuko dira

Erredakzioa | DONOSTIA

Arabako, Bizkaiko eta Gipuzkoako ezindu fisikoei ez zaie gutxieneko diru sarrerarik izatea eskatuko, babes ofizialeko etxebizitza bat eskuratu ahal izateko. Hala iragarri zuten atzo Eusko Jaurlaritzako Etxebizitza eta Gizarte Gaietako sailburu Javier Madrazok eta Etxebizitzako zuzendari Sonia Samaniegok. Orain arte, gutxienez 3.000 euroko diru sarrerak eskatzen zitzaizkien horrelako etxebizitza bat eskuratzeko zozketan parte hartzeko. Horren inguruko legedia onartua dago jada, eta 2004ko udaberrian sartuko da indarrean.

Erabakiaren berri emateko eskainitako prentsurrekoan,

Jaurlaritzak abantailak emango dizkie ezindu fisikoei babes ofizialeko etxeak eskuratzeko

Madrazok eta Samaniegok horrelako neurriak hartzearen garrantzia azpimarratu zuten. «Ezinbestekoa da babes ofizialeko etxebizitza bat eskuratu ahal izateko ezindu fisikoei ezartzen zaizkien baldintzak arintzea», adierazi zuten. Horrela ezindu fisikoen gertuko senideek ere hainbat abantaila izango dituzte. Lehen gutxienez 9.000 euroko diru sarrerak izan behar zituzten; orain kopuru hori hiru aldiz txikiagoa izango da: 3.000 eurokoa, hain zuzen.

Ezinduen bizi-baldintzak hobetzeko planak bultzatzeko udalei ematen zaizkien lagun-

tzen berri ere eman zuen Madrazok. Etxebizitza eta Gizarte Gaietako Sailak 4 milioi euroko aurrekontua du horretarako, baina 994.076 euro ez dira banatu. Izan ere, hainbat herri eta hiritako udalek, Donostiakoak eta Gasteizkoak esaterako, ez dituzte eskatu laguntzak. Etxebizitza sailburuak laguntzen garrantzia azpimarratu ostean, horiek eskatzeko deia egin zien udalei.

Adinduentzat 470 etxebizitza eraikiko dira Gipuzkoan

Gipuzkoako Foru Aldundiko Gizarte-kintza Departamentuak

edadekoentzat 470 etxebizitza eraikiko ditu 2005. urterako. Gaur egun, Gipuzkoan 900 baino gehiago dira, beren kabuz bizitzeko gai diren arren, zaharren egoitzetan dauden adinduak. Gehien-gehienek beren etxea izateko zailtasun ekonomikoak dituzte.

Etxebizitza horietan edadeko bat baino gehiago bizi ahal izango dira. Askok baitira bakarrik bizi nahi ez dutelako zaharren egoitzetara jotzen duten adinekoak.

Gaur egun, 223 dira Gipuzkoan osoan adinduentzat dau-

den etxeak. Hala eta guztiz ere, hainbat eskualdetako egoera ikusita, arlo horretan gabeziak daudela adierazi zuen Gizarte-kintzako Ramon Jauregik. Proiektua gauzatuz gero, hiru-koiztu egingo litzateke adinduentzako dagoen etxe kopurua.

Etxebizitza horiek hainbat baldintza bete behar dituzte. Hala, gutxienez 40 metro koadro erabilgarri izan beharko dituzte, eta hirigunean egon beharko dute. Hala eta guztiz ere, etxebizitza guztiak ez dira guzti berean egongo. Aldundiak belaunaldien arteko harremanak bultzatu nahi ditu, eta ez soilik edadeko jendea bizi diren eremuak sortu.